



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8



Trump-i New York nung kuli agütsütsü memolung



Vincent Kompany-i Burnley den tenangzüktepba yanglushi

VOL. XX NO. 206 (ADOK 206) DIMAPUR SANGTENNÜ (TUESDAY) MONUPII (MAY) 09, 2023 ₹ 5.00

Manipur sorkari auertem aser ali rakzükertem merenshitsu

Imphal, May 8, 2023

(Agencies): Manipur nung tensa mejungi aliba mapang nisung kari relief camps mesüra safe shelters nung jenoka alirtem kidang nungi auyaba aser ali atsünga agiba osangtem lir.

Iba atema Manipur sorkari osang ka metetdaksüogo aser aibelenba putetertem özüing tapet agi merenshitsu ta ashi.

State sorkarisa lendong balala ajanga kongshia alirtem asoshi confidence-building, return, aser rehabilitation maparen inyaksü sentong renemer.

Lendong atalokba tesemtem nung kiojen aser ali kümzüka ayutsü atema Superintendent of Police ajaki mapa inyaksüla aser Central security forces, military o paramilitary forces teyari agia round-the-clock, foolproof security agütsütsü ta Commissioner and Secretary, Manipur H Gyan Prakash-i tetuyuba agütsüogo.

Manipur nung mepetmesü adokba mapang mejangjatetba nisungtemi prangpong 1041 tashi rakzüka bener ogo ta Chief Minister N Biren Singh-i ashi.

"Prangpong 1041 auyaba nungi 214 dang ngutetogo" ta pai ashi.

Manipur nung tenla kitem rondoktsü anungji iba ya lokti ka anema inyakba asü masü ta osangbeneri astüngdangdang "iba amajia ataloka alitsü akok" ta CM Biren-i ashi.

"Nisung kar dak tenük yoka inyaker mesüra tamangba yimsü dak sendakba tesemtem amak ta nibo mamanger. Ajüsüaka telok kar dang tenük yoka inyakera alitsü akok saka bushisüngdang asüba sülen ang osang tejangja metettsü" ta CM Biren-isa metetdaksü.

Lendong balala nung tasür shia nem Rs 5 lakh teyari agütsütsü. Sorkarisa kanga mejungi yirur shia nem Rs 2 lakh aser terara yirur nem Rs 25,000 teyari agütsütsü" ta paisa ashi.

Ano, ki rondoktsüba kibong shia nem Rs 2 lakh agütsütsü aser sorkari ki rondokba ajak yanglutsütsü, ta CM Biren-isa ashi.

Lendong balala nung nisung 60 tashi taküm samaogo, ta paisa shisem.

'Disputed Area Belts' nung mapa meinyaktettsü: UNTABA

Dimapur, May 8, 2023 (TYO):

Assam aser Nagaland tsüngda 'Disputed Area Belts' nung oil & gas indang senden amentsü aliba ya nungdak mali kechiyong iba ajanga mapa telemtetba tajung kecha magitettsü ta United Naga Tribes Association on Border Areas (UNTABA)-i metetdaksüogo.

State ana tsüngda teti atema arrtsü meladang tashi petroleum resources atema exploration aser

drilling mapa kecha meinyaktettsü. Külen, Assam sorkari Supreme Court nung Civil Suit No.2 of 1988 benoker küm 35 tashi metembangtet lir, ta UNTABA-i sangdong ka nung ashi.

Nagaland sorkari Assam sorkar dang parnoki benokba Civil Suit meyipa agitsü aser kuli tejangja alibatem nung ajemdaker iba ken o angatettsü atema mesüzüksüla ta UNTABA-isa metetdaksüogo.

tEA-i tetsür nem Zero Interest Loan aputsü

Kohima, May 8, 2023 (TYO):

Hombarnü Kohima nung Entrepreneurs Associates (tEA) ajanga tetsür shishilembar 20 nem sen tetemlok melii aputsüogo.

Iba mapa nung Caring Friends, Mumbai ajanga yarir aser tEA indang Kohima head office nung tetsürtem nem loan agütsü.

Tanü tashi nung tEA-i tetsür 1000 jungnüa nem sen tetemlok makai dang sen aputsüogo.

"Iba mapa ya Uplifting Women Street Vendors Program kübok inyaker aser tEA-i tetsürtem taginüba aser talisa shishilembartem yaritsü tebilemba lir. Tetsür shishilembartem i rongsenketzung maparen nung shilem tulu agir" ta tEA CEO Neichute Doulo-i ashi.

Tetsürtemi shishilembaba jenjang ajungkettsüla aser nenoki aazükba nungi 20% kümzüka ayutsü merangtsüla. Iba ya Laishiba nung Yosef taküm otsü nungi agitetba lir. Tesürtemi küm pungu atema nenoki aazükba nungi 20% bendena yura iba

ajanga mapa tulu inyaktettsü mesüra ali kimung alitettsü" ta CEO Doulo-i ashi.

"Tetsür shishilembartem metsümeshidak maliba mesüra 'pay and use facilities' nung sen meindoktsü atema tzi majemba tEA survey ajanga bushitetogo. Iba ajanga tetsür shishilembar aika temang nung timtem adokba aser urinary infections asüba osang angazükogo" ta pai ashi.

Item khuret ya tEA-i local administration aser policy makers den lemsatepogo ta Doulo-isa shi.

Iba sentong nung tEA Community Mobiliser Azonuo Chietsu-i women vendors aser interested entrepreneurs asoshi products & services osang metetdaksü.

Maneni, Carl Rogers Institute of Mental Health and School Counselling nungi Ruovizokhonuo E. Pienyu-i tetsür shishilembartem den mental health indang temetettsü lemsatep aser Deputy Director (Mainstreaming), NSACS Ainato Yeptho-i 'Aids and Blood Donation' indang osang metetdaksü.

Nagaland nunga World Red Cross day mongogo



Raj Bhavan nung aliba Dr Imkongliba Ao hall nung Indian Red Cross Society, Nagaland State Branch ajanga World Red Cross Day amungba sentong nung tangokba noksa angur.

Dimapur, May 8, 2023 (TYO):

Tanü alima ajanga den külemi Nagaland nunga World Red Cross Day mongogo.

Raj Bhavan nung aliba Dr Imkongliba Ao hall nung Indian Red Cross Society, Nagaland State Branch ajanga iba sentong ayonga among.

"Everything we do comes #fromtheheart" omen nung ajemdaker amongba sentong nung Nagaland Governor aser IRCSN President, La Ganesan aden.

"Philanthropist Jean Henry Dunant bilemteta iba anogo ya pelatepa amonger. Jean ya May 8, 1828 nü aso aser alima nung Red Cross volunteers, members aser staff million aikati mapa tajung inyakba atema iba anogo nung tetushi agütsür" ta Governor Ganesan-i ashi.

"Taküm omen ajanga Red Cross tangatetba sayur. Red Cross ya Impartiality, Neutrality, Humanity, Independence,

Voluntary Service, Unity aser University tamendakdak tenet nung ajemdaka lir" ta pai ashi.

"Red Cross-i küm 160 tema humanitarian service tongti süa inyaka arur aser rara, alima lendong aser tanga rondak nungdakba mapang teyari agütsüogo. Red Cross ajanga lokti aika yanglutsüogo" ta Ganesan-isa ashi.

Red Cross-i tanü alima nung tayongzükbatem atema tongti shilem agir. Red Cross züngsemtem aser lanurtem indang voluntary service atema tenüsang agütsür ta pai metetdaksü.

"Asenoki inyakba ajak temeim agi inyaksüla. Mulungsoa aser aochia inyakba ajanga alima nung temelenshi tajung bener aruteter" ta Governor-i ayongzük.

Red Cross ajanga nübertem dang aochiba aser aria bilemba sayur. Anungji maneni humanitarian service tajungba nung agütsütsü ayongzük, ta Ganesan-isa ashi.

"Alima tesem balala nung inyakba maparen aika nung Red Cross Nagaland ajanga shilem agia arur aser asenoki maneni humanitarian service indang ambassadors asütsü merangdi" ta Chairman IRCSN Abeni TCK-ia ashi.

Iba sentong nung General Secretary IRCSN Akhale V.Khamo-i Secretary General, IRCS, HQ, New Delhi indang osang zünga metetdaksü.

"Service to Men is service to God" ta asüba tangatetba temulungba nung yur Nagaland nung International Red Cross Society kübok inyaktertemi maneni tajungtiba agi inyakang ta Secretary General, IRCS-i tayongzükba agütsü.

Iba sentong nung mendenji Managing Committee Member IRCSN R. Rose Chakhesang liasü aser Chakhesang Baptist Church, Minister Hill, Kohima Pastor Rev Dr Vevo Phesao-i temoatsü meshia sarasadem.

SC-i Centre aser Manipur sorkartem nem tetuyuba agütsü

New Delhi, May 8, 2023

(Agencies): Manipur nung nisung taküm aser kiojen aika akoksaba atema tebilemstü bena Supreme Court-i Hombarnü Centre aser Manipur sorkartem nem tetuyuba agütsüogo.

"Kin dak rangloker tensa mejungi akümba atema relief and rehabilitation maparen tuba inyaksüla aser tekülem kitem kümzüka ayutsüla" ta Supreme Court-i ashi.

Centre sorkari Chief Justice D Y Chandrachud-i aniba SC bench dang Manipur nung tesüiba anogo ana tashi tensa tajungba liasü ta ashi.

Manipur nung "humanitarian issues" nung ajemdaker azütokshia raratepba sülen relief camps nung teinyaksü shitak inyaksüla aser item nung jenoka alirtem nem food, ration aser medical facilities amala basic amenities

agütsütsü, ta SC-isa metetdaksüogo.

"Onoki nisung taküm laluba, kiojentem akoksaba atema kanga tebilemstü abener" ta CJI Chandrachud den Justice P S Narasimha aser Justice J B Pardiwala na adenba bench-i ashi.

Iba nung okadaki mapa meinyakteter anungji sorkari teinyaksüla ajak inyaksüla, ta parnokisa ashi.

Class 12 nung takok angur tetsürtem skill ka nung mongin akümstüla

New Delhi, May 8, 2023

(Agencies): Class 12 nung takok anguba tetsür 50% bosa 2025-26 tashi nung skill ka nung mongin küm daksütsü atema Centre sorkari alizüng yua lir ta Ministry of Education-i metetdaksü.

"India nung tetsürtem nem quality education agütsütsü kanga tongtipang. Parnoki mapa angutsü aser industry-i nungdakba ama shilem agitettsü atema vocational education agütsütsüla" ta Department of School Education and Literacy nung Additional Secretary Vipin Kumar-i ashi.

"Iba alizüng atongtsü atema Ministry of Education-i state sorkar tem den jembitepdar. Pei pei tesem aser industry aliba nung

ajemdaker mapa inyaksü. Class 12 standard nung takok angur tetsür 50% boksa 2025-26 tashi nung skill ka nung mongin küm alitsüla" ta pai ashi.

'IDEATE 2023' mungdang nung Vipin Kumar-i iba osang lemsatep. Iba mungdang ya India nung tetsür tainlonglong tashi itdaksütsü atema asalentong yanglutsü atema ayonga agi. Iba sentong nung policymakers, industry leaders aser experts aden.

"Alima nung tainlonglong teimtiba aliba linükji India lir. Iba nungi tetsür 47% shi lir anungji parnok technical aser educational jenjang ajungkettsüla. Yamaji asü nungdang parnok skill nung

mongin akümstü aser tayongzükbatem kokteta aotsü" ta FICCI President Subhrakant Panda-ia ashi.

India nung education, health aser job opportunities nung gender gap shibangtsüla aser iba ajanga rongsenketzung renloktsü aser tetsür-tebur tebandang malitsü, ta Panda-ia ashi.

"Lanutsürtemi mapa inyakba ajanga loktiliba ajangzüksü. Tainlonglong tetsürtemi maneni education bushira, kara kibong mekümra aser kara tanur mebenra parnok taküm piyong nung parnoki India GDP asoshi USD 110 billion shi bendenloktsütsü" ta Panda-isa ashi.



Aor yimten aser lokti sobaliba nung yimtak tebur chanutem shirnoksa küm 14 jungdir, parnok dang nungi tera tambu kar den zünga ser joko tain tenzüka ariju nung alitsü asoshi Süngpur zünga aitsü. Iba mapang nung jagi tenzüka item süngpurtemji ariju nung taintem dang nungi otsülem, yartsüngsang aser inyaksangshi maparen tapu balala angazüka ayiptsü. Taküm Chuchuyimlang nung May 4, 2023 nü mepu pezü nungi parnok asangur chanu 246 Süngpur zünga aiba anogo nung arem nungi kümbok bener adoka milen süa ayuba noksa nung angur. Item kümbok milenji yim ajungben rongdak nungdak nung amshitsü atema ariju nung ayutsü. Item kümbok milen bener adok dang tenbang züngari süngkong tema agizükba kasa noksa nung yasa angur. Tanübo iba sobaliba tajung ya, tesasatsüka, yimtsüng aika nung mebenshiteti endokogo.

Dimapur Red Cross pur World Red Cross Day mungogo



Deputy Commissioner, Dimapur, Sachin Jaiswal, IAS

Dimapur, Monupii/May 08 (TYO): Alima tesem ajunga nung amai World Red Cross Day ya iba telok tentetsang Henry Dunant asoba anogo nung amunger. Kasaji Dimapur nunga World Red Cross Day ya Livingstone Foundation International indang auditorium nung munga liasü, kong tongti tesemdanger Deputy Commissioner, Dimapur, Sachin Jaiswal, IAS aser tetushi tesemdanger Andrew Ahoto, Chairman LFI aser Chandu Agarwal, Chairman Red Cross, Dimapur District Branch nungertem liasü. Iba sentong nung jembidang

Jaiswal-i Dimapur Red Cross Managing Committee aser züngsemtem aser volunteers aser temolunger temi timtem nung alir nem teyari mapa tajung inyakba asoshi tenüngsang agüja liasü. Dimapur Red Cross züngsem temi shiranger nem azü tenla agütsüba asoshi pelaba lemsatepdang pai nüburtem aser kin balala dang tamangba yimsü, caste mesüra kin telesa makai nungdakbapür nem azü agütsütsü ajungshia liasü. Lokti ajungtsü asoshi jembiba aser inyakba teti kasa asütsüla, ta tetushi tesemdanger Andrew Ahoto-ia ashi aser Chandu

Agarwal-o tarur pela agizükba o jembidang tia balala indang lemsatepa liasü. Civil Hospital Dimapur nung Blood Bank In-charge, Dr Temsu Lemtur-i iba sentong nung jembidang Dimapur Red Cross ajanga amshitsü blood center ka nungdaker aser Nagaland nung district ajak nung azü nungdakba dang nungi azü agütsür kanga tajemba lir, ta ashi. Sentong nung Dimapur Red Cross indang Vice-Chairman Ajay Sethi-i Dimapur District Branch ajanga 1980s mapang nungi Honorary Secretary viz. J.S. Choudhury, K.K. Paul, Captain Hekiye Sema & Inaka Assumi nung lenisüba kübok teyari agütsüba maparen balala inyaka aruba indang jembiba aser Honorary Secretary K.K. Paul-i 1863 küm Henry Dunant ajanga Red Cross tentetba indang jembiba liasü. Iba sentong nung Managing Committee züngsem Ahidur Rahman menden liasü aser Treasurer Ashok Agarwal-i melepzüng o jembiba liasü. Iba sentong ya Medizhanuo Tapa-i sarasadema tenzük aser Gideon Sangma aser par teloki ken ka tena liasü.

Mejangjaba/tiazü video nung mamangtsüla: PRO (Defence)

Dimapur, Monupii/May 08 (TYO): PRO (Defence), Kohima & Imphal ajanga sangdong ka nung ashiba agi, tang tensa mejungi aliba mechi civil administration ajanga civilian ketdangsurtem duty nung yaritsü asoshi Army aser Assam Rifles teyari meshia liasü. Tesüiba ghonda 96 dak tema Security Forces temi tensa azüoktsü atema agiyonga arur, ta ashi. Nisung 23,000 shi tesem balala nung prokshia aliba nungi nisung 9,500 shi Meitei kin nungi lir aser nisung 10,000 shi Kuki nung lir. Parnok ya Army aser Assam Rifles indang Company Operating Bases/ Military Garrisons amala nung anisüngzük agütsür. Yangji ajemdaker Army aser Assam Rifles temi tensa azüoktsü asoshi rescue operation ajak timi tebensa makai inyakba sayur, ta sangdong ajanga ashi. Ajisüaka security forces temi kin ka dang anepalur ta timtem aser mangatetep

adokdaksütsü bilemba nisungtemi tiazü olulu prokshir. Iba amala olulu ya nokdangtsüla, kechiaser parnoki yimten yimsüsüba nung tejangraba maliba sepaitem tejak menentsüba kisüng masü saka mapa meranga inyakba sepaitem tezü tangdaksür, ta ashi. Tesasatsüka Assam Rifles temi kin ka nungi nok-nü bena alirtem yarir ta tai tonglokja tiazü video ka prokshiba mapang lir. Iba video ya state nung yimjung-tesunep raksatsütsü atema kisüng yangluba masü saka sepaitem tenüng menütsütsü asoshi yangluba amai ajiteter, ta ashi. Linük anemba nisungtemi iba tiazü/taila video yanglua tajemdak dak makai tai tongloktsüba Assam Rifles temi sashi-sashia aitsür. Indian Army ajanga media, influencers aser nüburtem dang osang tejangja metettsü asoshi 'official sources & verified handles' nungi osang agitsü mepishir, ta PRO (Defence) sangdong ajanga ashi.

Advisor Zhaleo Rio-i Modern College, Piphema Campus semzüktsü

Dimapur, Monupii/May 08 (TYO): Advisor, Urban Development & Municipal Affairs, Zhaleo Rio ajanga Hombarnü Modern College, Piphema Campus semzükja liasü. Taoba mapang iba college ya Porter Lane Kohima nung Modern Academy den külemi liasü, saka Class 11 aser 12 inoksembe den undergraduate aser tekalen courses tem aliba ajanga Modern College ya Piphema-i belen. Modern College ya Modern Society of Education kübok lir, kobai kaket reju asem, Modern Higher Secondary School - Class Nursery nungi 12 (stream asem) aser kasa Porter Lane Kohima tesem nung Modern Institute of Teacher Education (MITE) aser Modern College, kong Bachelor of Arts aser Bachelor of Vocation agütsür, koba Piphema nung NH-2 tekalen lir, ta college indang Managing Director Pelee Hekha-i ashi. Piphema campus nungya academic block, indoor stadium, hostel asem, Botanical Garden, Dairy Farm, ango tsübo aser orange orchard den football, basketball, volleyball aser Badminton o Table Tennis atema

indoor stadium lir ta pai ashi. Modern College indang office ka Kohima nung maneni alitsü, kong MHSS den IGNOU study centre alitsü, ta Hekha-i metetdaksü. Iba sentong nung jembidang Advisor Rio-i kaketshirtem dang Modern College ajanga agütsüba modern amenities aser facility nungi tajangzük bushitsü ayongzük. Campus ya tesem tajung ka nung lir, anungji kaketshir temi temolung agüja azüngtsüla aser takok tajung angutsüla, ta pai ashi. College nungi shisaliok tajung angazüktsü ayongzük, tanü-asüng tetoktepba lima nung formal education ya teperi masü, anungji shisaliok den economy, skill development, capacity building aser ethical value tema angazüktsüla, ta Advisor-i ashi. Anungji azüngtsü aser sorkar mapa bushitsü atema kisüng masü saka meranga inyakba nisung kaka akumtsüla, kechiaser azümesener tagidak maka, ta pai ashi. State nung zünger mapa mangur nisung 72,700 dak tema tenüng zülüoka lir, saka itemji

ajanga tezü matangtsüla aser tayongzükba ka ama agia sorkar mapa kisüng masü saka private sector aser entrepreneurship nung rangloktsüla aser competitive exam tem nung takok angutsüsa azüngtsüla, ta Zhaleo-i ashi. Nagaland nung ali ya jurila mesüra nüburtem meyong lir aser terenlok mapa inyakang state sorkari ali kibur nungi timtemajurur, anungji Modern Education Society den tezüngzüktep agiba tatem tashi amshitsüla, ta pai Piphema nüburtem dang ayongzük. Kasa anogo Zhaleo Rio-i Botanical Garden semzüktsü, koba Ministry of Environment, Forest & Climate Change kübok Botanical Survey of India ajanga yaria yanglu, campus indang nungshilong lapoktsü, academic block, hostel asem aser Indoor Stadium semzükja liasü, koba ali acre 102 nung lir. Modern College indang principal, Dr Vitsou Yano-i tarur pela agizükba o jembiba aser College Development Manager Kaikho Losü-i melepzüng o jembiba liasü. Iba sentong nung Modern College hostel nung alirtemi temeja ken ka tena liasü.

Advisor to CM-i Kohima Press Club pur ajuru

Dimapur, Monupii/May 08 (TYO): Advisor to Chief Minister, Abu Metha-i Directorate of Information and Public Relations (DIPR) aser Kohima Press Club (KPC) ketdangsurtem den senden ka Kohima nung mena liasü. Kidanger state tem nung sorkari osangbener nem teyari balala agütsüba medemdanga iba senden nung KPC ajanga osangbener ajangzüktsü atema pension scheme agütsütsü, accredited journalists indang Operational Subsidy timba kumtsütsü aser state sorkar teyari nung KPC building yanglutsütsü onüktem benoka liasü. Metha-ia state nung osangbener aser media temi timtem balala ajangshiba

azüoktsü asoshi pai angatetba lemsatep aser osangbener temi benokba onük tem chief minister aser sorkar den benoka jembitsü ta ashi. Metha-i tweet ka nung "Kohima Press Club ketdangpurtem den senden tajung ka menogo. Osangbener aser media nung inyaker dak sendakba ken o onoki jembiba aser tayongzükba balala lungjemer koktettsü indang shisa lemsatepa liasü," ta ashi. "Tensa balala nung osangbener temi anibelem mesasai inyakba pela agizüker. Tanen makai democracy tashi itshidaksüba atema pelar." KPC ya tir Alice Yhoshü-i anir liasü aser iba senden nung IPR head of department Dzuvinuo Theünuo den ketdangsurtem dena liasü.

Tihar Jail nung Tillu tepsetba ken o nung police 7 mapa nungi anentsüogo

New Delhi, May 08 (Agencies): Tihar Jail nung ozüing alema inyakba telok ka nungi züingsem, Tillu Tajpuriya tepsetba tatalokba ken o dak sendakba nung Tamil Nadu Special Police (TNSP) nungi police tenet mapa nungi anentsüogo.

Tihar jail nung puoka alir telok ka nungi züingsem pesüi kotari amshia Tillu tsüingsetba mapang nungi Tamil Nadu nung police tenetji duty nung liasü. Iba tatalokba mapang nung duty nung alir Tamil Nadu nungi police tenet jagi repranga dang toktsü; police tenetpronglaji Tamil Nadu-i meyipa yoktsü, ta Jail ketdangsertemi metetdaksü.

Anogo ishika jakdang Director General of Delhi Prisons, Sanjay Beniwal-i shidi ka ajanga Tamil Nadu Police dang police tenet anema inyaksüla, ta metetdakja liasü. Pei mapa nung tamakok anguba atema TNSP nungi ketdangsertem den senden mena liasü, aser iba mapang nungi TNSP ketdangsertemi item police anema inyaksü ta nangzüka liasü.

Jail ketdangser kati, "Tamil

Nadu Police-i par police tenet mapa nungi anentsüogo aser parnok meyipa yoktsü metetdaksüogo," ta metetdaksü.

TNSP nungi police tenetji Tihar jail nung cell number 8 nung duty liasü aser iba cell nungi tepuokdak alir nisung pezüi Tillu kotari agi tsüingseta liasü.

Thar jail aser telungtet nung TNSP-i security agütsür.

Tihar Jail nungi CCTV video ka social media nung prokshioigo aser iba video nungi security police nokdaka lia tangartemi kotari agi Tillu Tajpuriya dak atsünger. Police-i pa ajunger aoba mapang nunga tangartem jagi maneni pa dak atsünger.

Mongolbar (May 2) anepdang Tihar Jail telung nung Gogi telok nung züingsemtemi Tillu dak kotari agi 90 ben dak tali atsüng. Ajisüaka pa taküm lia police-i pa ajunger aoba mapang nunga aibelenertem jagi maneni pa amaker.

Telok jagi maneni Tillu amakyonga police-i repranga dang toktsüba CCTV video ajanga jangjaogo.

Kerala sorkari tourist rong lendong bushisüngdangtsü tuyuogo



May 07, 2023 aonung Kerala kübok Malappuram district nung rong ka tzü telung nung meküpokba sülen Hombarnü Kerala Chief Minister, Pinarayi Vijayan-i iba lendong nung yirurtem semdangtsü atema hospital-i arudang tangokba noksa nung angur. Raliwalirtem rong ka tzü telungi aiba lendong nungi nisung 22 süogo.

Thiruvananthapuram, May 08 (Agencies): Amongnü aonung Malappuram district, Kerala nung tourist rong ka tzü nung meküpokba lendong nung nisung 22 asüba sülen anogo ka lir Hombarnü Kerala state sorkari iba tatalokba judicial-i bushisüngdangtsü tuyuogo.

State sorkarisa iba lendong nung asür kibongtem shia nem sen lakh 10 agütsütsü nangzük.

Kerala Chief Minister, Pinarayi Vijayan-i Tirurangandi

Taluk hospital semdanga yirua alirtem ajuruba sülen osangbenertem den jembidang pai, iba lendong nung yirua alirtem treatment agidang indokba sen ajakji sorkari agütsütsü, ta metetdaksü.

Iba lendong nung Kunnummel'er kibong kija nungi züingsem 12 asü.

Tanur nung party ajak senden ka ayongzüka amenba sülen Vijayan-i, iba tatalokba ya judicial ajanga

bushisüngdangtsü, ta metetdaksü.

"Iba ya judicial ajanga bushisüngdangtsü atema party ajak senden nung telemtetba agiogo. Bushisüngdangbaji ajanga rong dak sendakba technical timtem aser tanga lenlatem ayimjemtsü. Technical tsütsü mongintem densema judicial commission ka tentetsü. Kerala police indang special investigation team katia iba tatalokba ya bushisüngdangtsü," ta pai osangbenertem nem metetdaksü.

Chief Minister-isa, tourist rongtem lendong majurutsü atema sorkari telatetba kat renema lir, anungji ibaji alema inyaker asü meinyakar ibajia bushisüngdangtsü, ta ashi.

Paisa, iba lendong nung yirua hospital-i anir aoer nisung ter nungi nisung anabo kidangi meyipa yokogo aser tang nisung ti treatment tagidak lir, ta metetdaksü.

Amongnü aonung 7:30 ako meta tourist rongji Thoovaltheeram tzüküm anasa tzü telung nung meküpokba liasü.

Pakistan-i May 12 nü India nunger angopur 199 chioktsü

Karachi, Monupii/May 08 (Agencies): Pakistan nung ketdangsertemi Hokolbarnü India nunger angopur 199 jail nungi chioktsü; India nunger kata angopurtem denji külemi chioktsü liasü saka tepuokdak lia süadokogo.

Jail nung tongti ketdangser aser Sindh nung Correction department nunga ketdangser, Kazi Nazir-i, sorkar ministry balalai Hokolbarnü India nunger angopur 199 chioktsü atema tuyuogo, ta metetdaksü.

Angopurtemji Lahore-i yokba sülen Wagah arrtsü nung India nunger ketdangsertem ket nung agütsütsü. Tang

anogpurtemji Karachi nung aliba Landhi Jail nung puoka lir. India nunger Zulfiqar-a angopurtem den külemi chioktsü liasü saka pa Honibarnü Karachi nung aliba hospital ka nung süogo, ta paisa metetdaksü.

"Landhi jail nung ketdangsertemi ashiba agi, India nunger tepuokdak alisangji temang kanga meta aser teku nung timtem liasü. Taoba hopta pa temang tamajungba akümba agi hospital-i anir ao saka tepokpok nung timtem adoka asü," ta paisa metetdaksü.

Pakistan India People's

Forum for Peace & Democracy-i ashiba agi, tang Karachi nung aliba Landhi aser Malir jail na nung India nunger angopur 631 aser civilian ka lir.

Forum nung inyaker, Adil Sheikh-i, India nunger angopurtem jagi Pakistan aser India na tsüingda tezüingzüktep agia aliba alema Pakistan nunger tzüyim nung ango apuba agi parnok pua jail nung puoka liasü, ta metetdaksü.

Tang Karachi nung aliba jail balala nung India nunger angopur 654 lir aser India nunger jail nung Pakistan nunger angopurtema parnok 83 puoka lir.



May 08, 2023 nü Rajasthan kübok Hanumangarh district nung Indian Air Force (IAF) indang MiG-21 raraba tayimtsü ka tsükokba tesem nung nisung adenshia aliba noksa nung angur. Iba lendong nung civilian ana asü.

केनरा बैंक Canara Bank **SALE NOTICE** **DIMAPUR-I BRANCH**
 First Floor, Latika Complex, Nyamo Lotha Road (Church Road), Dimapur- 797112

Securitisation and Reconstruction of Financial Assets and Enforcement of Security Interest Act, 2002, Security Interest (Enforcement) Rules, 2002 kübok Rules 8(6) den külemi azüngtsü akok; iba Act nung ajemdaker kiojen ayoktsü atema E-auction Sale Notice agütsür.

Nüburtem dang iba sangdong agütsür, talisa sen apur aser Guarantor(s) dang tsüinglanglen agüja aliba mortgaged/charged asüba kiojen Canara Bank nung Authorised Officer-i agiadokogo, aser sen apur & Guarantor dang nungi Branch of Canara Bank-i sentsüh angütsü atema 29.05.2023 anogo nung iba kiojen aser iba nungi aliba ajak yokadoktsü ta sangdonger. Earnest Money Deposit (EMD) ji 26.05.2023 nikongdang 4.00 ako tashi nung mesüra ibaji matongdang deposit asütsü. Auction ji website: <http://indianbankseaction.com> nung online ajanga "Online E-auctioning" asütsü. Auction anogo aser mapangji: 29.05.2023 anogo nung anüingdang 11:00 ako nungi nikongdang 1:00 ako tashi. (Sale metembang tashi minute pongunu (5) mapang atsülangtsü). Branch, sen apur/guarantor, liability, kiojen aser EMD osang tejangja, reserve price:

Sl. No.	(A) Name & Address of Secured Creditor/ Branch (B) Name of Borrower/ Guarantor	Brief Description of Immovable Property	(A) Total Liabilities (Rs.): (B) Reserve Price (Rs.): (C) EMD (Rs.): (D) Increment Amount (Rs.):
1.	(A) Canara Bank, Dimapur- I Branch, First Floor, Latika Complex, Nyamo Lotha Road (Church Road), Dimapur- 797112 (B) Borrower: M/s. Marble and Granite House- Partner:- Mr. Shiniho Kakheto Jakhalu & Mr. Shiniho Vikheto Sema M/s. Trusted Fabrication- Prop:- Mr. Shiniho Kakheto Jakhalu and Mr. Shiniho Kakheto Jakhalu Guarantors: NA Corporate Guarantors: NA	Land measuring 01-Bighas, 02-katha, 10-Lechas (200fts x 180fts= 36,000.00 sqfts) situated at thilixu, 3rd Mile Block-IV, Bye Lane 5 under Revenue Circle- Dimapur, Dist- Dimapur, Nagaland. As per land allotment order Sl. No.90 dated 25.05.2012 Bounded By: North: Approach Road South: Fishery East: Paddy Field West: Hohiheli	(A) Total Liab.: 1,68,97,360.75 + further interest & cost. (B) Reserve price: 1.35 cores (C) EMD: 13.50 lakhs (D) Increment Amount: 1,00,000/-

Auction atema telatetbatem tejangja metettsü atema Canara Bank indang website (www.canarabank.com) nung aliba link "E-Auction" reprangang mesüra Manager of Dimapur-I Branch den Contact No. +91 8638110653 ajanga office mapang tongtepratepang. Date: 08.05.2023, Place: Dimapur Authorized Officer, CANARA BANK

केनरा बैंक Canara Bank **SALE NOTICE** **DIMAPUR-II BRANCH**
 Nyamo Lotha Road, Near Plaza Bakery, Dimapur- 797112

Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 nung Rules 8(6) kübok E-auction ajanga kiojen ayoktsü Notice.

Public aser talisa sen apur (tem) aser Guarantor(s) dang, Secured Creditor dang mortgage asüba tsüinglanglen shia aliba kiojenji Canara Bank nung Authorised Officer-i agiadokogo, aser ibaji Branch of Canara Bank-i sen apur aser Guarantor sentsüh aotsü atema 29.05.2023 anogo nung "Yangji aliba" aser "yangji aliba ajak" yokdoksü, ta sangdonger. Earnest Money Deposit (EMD) ji 26.05.2023 nikongdang 4:00 ako tashi nung mesüra ibaji matongdang deposit asütsü. Auction ji website: <http://indianbankseaction.com> ajanga "Online E-auctioning" asütsü. Auction asüba Anogo aser Mapang: 29.05.2023 nü anepdang 11:00 nungi nikongdang 01:00 ako tashi. (Iba sale metembang tashi mapang shia minute 5 atsülangtsü). Branch, borrower/guarantor, liability, kiojen osang aser EMD, reserve price osang tejangja:

Sl. No.	(A) Name & Address of Secured Creditor/ Branch (B) Name of Borrower/ Guarantor	Brief Description of Immovable Property	(A) Total Liabilities (Rs.): (B) Reserve Price (Rs.): (C) EMD (Rs.): (D) Increment Amount (Rs.):
1.	(A) Canara Bank, Dimapur- II Branch, Nyamo Lotha Road, Near Plaza Bakery, Dimapur- 797112. (B) Borrower: M/s. Tizu Trade Agency Proprietor:- Kavito V Yepthomi Guarantors: Kiyekhu I Sema Corporate Guarantors: NA	EMT of Land standing in the name of Sri Kavito V Yepthomi covered by Patta No. 430, Dag No. 142/ 505, Mouza no. 03 situated at Village: Dubagaon Village, Near Ekran Pathar, Dist. Dimapur, (Nagaland) land measuring 1Bigha- 2Katha-13Lechas. Boundaries (As per Sale Deed): North:- Main Road and Mr. Zhekheto, South:- Mr. Vinizhe, East:- Main Road, West:- Mrs. Shela. Boundaries (As per Valuation): North: Land of Zakheto, South: Land of Merin, East: Land of Bihephu, West: Land of Shinine	(A) Total Liab.: 53,16,506.26 + further interest & cost. (B) Reserve price: 46.00 lakhs (C) EMD: 4.60 lakhs (D) Increment Amount: 50,000/-

Iba sale dak sendakba telatetbatem tejangja metettsü atema Canara Bank indang website (www.canarabank.com) nung aliba link "E-Auction" nung reprangtsü akok mesüra Senior Manager of Dimapur-II Branch den mapa inyakba anogo nung office mapang Contact No. +91 9436633833/8337005463 ajanga tongteprateptsü akok. Date: 08.05.2023, Place: Dimapur Authorized Officer, CANARA BANK



TIR YIMYIM YIMOBILEM (EDITORIAL)

DIMAPUR SANGTENNÜ, MONUPII (MAY) 09, 2023

Covid-19 lendong ajemogo

World Health Organization (WHO)-i 2019 kum China nung tetsubutsü tashidak tasen ka pokteta nübortem taküm samaba ngua, iba tashidakji kechi tashidakar mejangja dang yongi alima ajaklen tetsubutsü tashidak tasen ka prokshidagi ta arrsangokja metetdaksüba agi, alima aika nung tashidak agi timtem takoksa anguba dang nungibo tashidak tsübutepba ajanga ajuruba timtem, takoksa aser tesama tuluba liasü. Asenokia item timtem takoksa anogotem aika ajuruogo. Tesülenang iba tashidak dangji Covid-19 ta jatsü. Atangji, iba tashidak ya tetsubutsüka liasü, kechiyong iba tashidak den raratsü mozü maka, anungji tamasayongi memenatsü merangtsüba dak alaka Covid-19 agi shirangertem anepalutsübaji meshirangertem nungi pilaa ayutsübaji dang liasü. Atangji, iba tashidak yagi tanüa nisung aika shirangdagi aser tasüa südagi saka taoba kum anasemka jakdang atalokba dang nungibo shirangertema aser asürtema kanga ajema kumogo. Iba jagi WHO ajanga nübortem dang joko Covid-19 tashidak ya tetsubutsü tashidak ka ama bilema tounüeni mao aser teinyaknüsü meinyaki mekazüsü saka sadoksadoka pei teinyaktsü mapaten akhi ama inyaka aotsü asoshi metetdaksüogo. Iba jagi alima nung joko Covid-19 tashidak wara kenyongi mali ta masü saka mesamai lir, anungji asenoki iba tashidakji memenatsüa tali shia alitsübajiang tongtibang teinyaktsü kumogo. Alima nung tashidak tasen poktet shia tamasabo Covid-19 tashidak poktetli tetsubutsüka bilema kümdanga aliba ama nisungtem kümdangshidaktsür. Aji oda, akhidang polio tashidak, Swine flu, Ebola, Zika aser monkeybox ama tashidak poktetba mapanga WHO ajanga alima ajak dangi tetsubutsü tashidak poktetba indang metetdakja liasü. Iba jagi jelia nübortem renemdaksü aser aika itemla tetsubutsü tashidak nungi kümzükogo ta bilemdi. Aji oda, tangbo item tashidakja kecha balaka tetsubutsü tashidak amato mebilemer. Ajisüaka, item tashidakji kenyongi mali meshimeshia samaogo ta masü saka nisungtemi kümdanga aliba ajanga memenar, anungji tashidakji mali den kasasa akümer. Kasaji, Covid-19 tashidak wara memenatsü atema ajembo agitsüla aser temang tashi itta alitsüla. Atangji, tangbo mozü kidang mesüra lokti tulu adenshidak tesem dak alaka akhidang ama teni tebang nembanga sü agi zübanger alitsüa majungshir aser nisungtem nungi pilar asen kija alitsübajia menüngdaker. Nisung dak ya tashi balaka lir, anungji kodang tashidak maketer nisung aika kuma akhi alu mapa inyaka lidir, tashidak jagi nisung tashiji matir, anungji menaloktsütsü makoker. Tongtibangsa, Covid-19 wara agi alima ajaklen tetsüba agi sünger timtemba mapang, nisung aikati tashi angaa Covid-19 memenatsü asoshi ajem agiba aser pei kümdang kümdanga aliba agi iba Covid-19 tongpang ya koktetogo. Atangji, tia maka asenok rongnungi iba tashidak agi shiranga temeimbatem aika pilaogo. Ajisüaka, alima nung asenok tasütsü aso, anungji Covid—19 agi masü saka pei nem lemzüksüba arishi anogo temer Kibubai aja südi ta bilema asenok mulung süngzükdi. Alima nung alirji aser nisungtem tashitemetet nung toktepa aienba putu ka nung alir asünungji, Covid-19 tashidak ya joko tetsubutsü tashidak masü ta sangdongaka, asenok asoshi iba osangji tepelatsü osang masü saka shisabolutsüka asütsü, kechiyong, temetet, Covid-19 tashidak melena ajungbenaka ano alima nung tashidak mesen tasen ka poktettsü. Ibajibo, ashiko, mopong nung jajaba miim wara-ang ka asütsüa akok. Tanü lima nung nisungtemi mozü dang masü saka tashidaka yanglur, ibajiang ano tetsubutsüka lir. Itemji meteta alima nung tashidak mali ama bilema masü saka tashidak tapu balala den külemi alir amai bilema kümdanga alitsüla. Iba jagi dang asen den külem alir tashidak mesentemji azüoka yutettsü aser asen ajanga tashidak prokshia maotsü.

OLEMSABANG

BILEMTETANGMA

-T. Lima Tzüwar, Ungma,
Aonglenden, Artang Ward

Yangi ni ajangshia aser ngua aruba yamai lemsatepner. Asen Nagaland state ngur külen nungi govt. kwiben melentepa arur yamaji town committee pungoben trokben tashi town chairman aser vice chairman melentepyonga aruogo. Saka kodang congress govt. aru, iba mapang ULB election sangdonga, ali tax, ki tax meshitsü tenzük. Nübur ajaki iba yabo magitsü ta sür town committee election sa akia aruogo. Saka lia lia ULB electionji agitsü ta sür noktak, anungji nisung taküm lalua ki tashi rongtokba ataloka lir. Anungji lendong mataloktsüsa town committee electionji tang aginungbo yimjung nung tempangtsü. Toaba mapang congress govt. mapang Nagaland Chief Minister S.C. Jamir aser Home Minister tang aliba Chief Minister Rio aliba mapang tenati ULB Municipal bener aru asünung tenadi meteta alitsüla. Asen Naga nunger kudasür takar akümtsüba, election mapang nübur mesüzüka asenoki vote alizüker govt kümer alirtem kanga junga bilemdangangma. ULB election agitsü mebilemi India govt-i terenlok inyaktsü asoshi sen crore noklang ana sür tenem bener yokba tuaki asen Nagaland tepur junga inyaktsütsü merangangma, aser temulung agüjangma. Asen Naga lima kudasür takar akümtsü yimtsüng nung alirtem dang nungibo town nung alir ita sen ngua alirtemang tesensakba tia nung alir. Kechiyong govt-i ita sen mapang shitak nung magütsüteter, iba den sarusaji onsara, iba den para ki nung alirtem pei ki kiburtemi sen meshir shisabuluteper. Para ki nung alirtemia ki tajung tajung nungang linür asünung ita ka nung ki kiburi Rs. 4000 – 5000 meshir iba den tanur school fee agütsür. Hajirapurtem hajara anir mali kechiyong ita sen mangur asünung hajara anitsü tasak akümer, anungji govt-i kanga bilemdangtsüla. Asen Nagaland nung town balala nung alir nübur ajakji ali kiburtem dang ali alir ki yanglua alir ita sen ngua alirtem ya shinga takar mali, kibongshia shisabulu agi sünger shingaia shinga danga meshitetba khuret agi sünger alirtem tang asünung ULB election agitsü atema bilema malitsüla. Tanü putu mapang yabo shingaia nütsüng nübur aser alima renloktsü aser tepur ajungtsü atema temulungjang nung bilema mali, pei ki yanglutsü aser pei takar akümtsü tang bilema alirtem dang asünung ULB electionji agiyonga ki tax ali tax akiyonga pei yangku kudasür asüngtsü aji tang bilemer asünung iba jaki kecha terenlok agüja mangur. Ali aser ki taxbo agütsü saka mapa inyakbabo maka ta asütsü. Asen Nagaland nung alir nütsüng nübortem ali aser ki taxji tanga magütsütsü yasüra magütsütsü asünung taoba mapang ama town committee electionjiang agi tajungba asütsü, kechiyong town repranger aser achayanger ka danga mali nungbo asen Nagaland nung aliba town ajak ya anak auyi agi sünger lenmang nung tejaja majung shiruru ayipba jaka akümtsü asü nung kechi südir süaka town committeeembo alitsüla aser asen nütsüng nübortem sarubosa agütsütsüla yamaji asü nungang town tepur ajungba tang masü aoer aser rakzükraakter malitsü asünung town committee electionbo agitsüla.

STATE NGUR KÜM ROKER TAIN POLITICS IBA TASHI ASAYATETER NO...???

- L. Kika Pongener

(Yashi adok nungi...)

Naga nunger Politician-tem & Party Worker-tem tangatetba kaji, Party ka nung dena lia, iba Party jenjangji mejungi kümra tatemtsü küli kar bushir tanga Party ka nung oa adentsü. Aji oda, Politician ka party balala melentepa sennudangji, party worker-tema tangatetba kecha mali pa sülen anidaka ora, asüng-yanu nuburtemi parnok dak-a tamang makatsü. Hau... Politician-tem & party worker-tem ajakji tashitemetetertem dang, anungji parnok dang shingai sayutsüla masü, saka maparen kar nungbo temetet ka amai inyaka manguba agi ajungshiteper. Public leader ka akümbaji küonung manger-mesangwa tsüngda atema masü, anogo ishika atema masü, mesura party-i rulling nung yimsu sua ali tashi atema dang masü, mesura pei party MLA-baji Minister menden atar, portfolio tajung ammer ali tashi atema dang masü, saka party-ji kechi jenjang nung lidir liang, rulling nunga liang, opposition nunga liang, party ideology nung akang-akanga ammeter masetshi-i nokdaksüla. Naga Peoples Front (NPF) party-i term asem tashi atong-atonga yimsusua arur, tang jenjang tera mejungi aküm nung, MLA-tem aser party worker-tem teimba ka party toktsür aobaji kangasa tesusatsüka lir. Ashiko party telung nung mepetmesu kar lira ajibo parnoki dang metet.

Surabangla, NDPP & BJP Party ya-a jenjang mejungi kümra, MLA-tem aser party worker-tema party toktsür tanga party nung oa adentsü asü koda...???. Political Party ka jenjang junga tashi-ita nokdaka alitsübaji 'Elected Member' & 'Party Worker'-tem dak tuluka keta lir masü no...???. Elected Member-tem & Party worker-tem ajaki pei akokba tashi (Capacity) yari Party tashi aittsü atema meranga inyakra party-ji tashi-ita nokdaksü ama bilemer. Tangarbo opposition nung suaka masetshi-i tashi-ita nokdaka alitsü aser sorkar jagi nuburi imlaba ama junga yimsu mesutetra, iba sorkarji tsükdaksütsü atema asa-lendong balala yanglur aser sorkar tasen melener, saka asen Naga nunger Politician-tembo Party ajunga Rulling sorkar sülenji opposition kata mali ajem-ajema dang anidaksü noo...???

Anungji Politician-tem dak nungi nuburtem taginubaji, Politician kaji pei ajungtsü bushiba (Selfish) masütsüla. Politician kaji pei ajangzüksü aser maongka dang bushiba (Opportunist) masütsüla. Ajisuaka, alima aser nubur meimba aser nubur taginuba metetba Politician ka-ka sudaksünur. Naga nunger nuburtemi opposition maliba sorkar (Opposition-less Govt.) maginur. Nuburtemi nenok shimtetbaji nubur atema jembitsü/inyaktsü atema shimtet. Anungji nubur taginuba nukjidong tonga inyaktsüla aser nubur ola anga-a yimsu asütsüla.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**



Yaküm June 16 nü Alabama nung aliba Arogo sentong ka nung teintet senso asem khasetba atema arrshi küm 71, Robert Findlay Smith (abelen) arrshi piyong tepuokdak ayutsü obendang agütsüogo. Iba sentong nungji pai Jane Pounds, Walter Rainey aser Sarah Yeager nunger khaseta liasü.

Catholic Arogoi Manipur nung alirtem atema tebilemtsü katsür

May 08, 2023: Taoba hopta nung tenzüka Manipur state nung rara adoka nisung 37 dak tema asüba aser nisung 23,000 shi jenshiba sülen India nung Catholic Arogo lenirtemi state nung yimjung alitsü atema ayongzükogo.

Catholic Bishops' Conference of India (CBCI)-i sangdong ka ajanga, "Catholic Arogoi kin mesüra yimsü kecha mebandangi Manipur nung alirtem ajak atema tebilemtsü katsür," ta metetdaksü.

May 3, 2023 nü lisopur telok kati tribal masüba Meitei nungertem nem "Scheduled tribe" jenjang agütsüba anema longkak aitba nungi rara adoka liasü.

Nütsüng million 3.5 aliba state nung nütsüng shilem 53 shi Meitei nunger lir aser Kuki den Naga nunger ama tribal nütsüng shilem 40 shi lir.

Catholic Bishops' Conference of India tenüng nung Tir aser tongti putir, Andrews Thazhath-i, "Ni putirtem ajak dang peipei Arogo

aser rejutem nung state (Manipur) nung yimjung alitsü atema sarasademtsütsü mepishir. Telok balala tsüingda ken o jembitsü aser maneni yimjung meimba tesem ka asütsü atema Manipur yangershitsü asoshi sarasademjang ta mepishir," ta metetdaksü.

May 7 nü Hyderabad nung tongti putir, Anthony Poola-i sangdong ka ajanga, Manipur nung rara ajanga takoksa angur ajak atema sarasademtsür, ta metetdaksü.

"Yimjung meimertem ama asenoki longjemer reshikangshi anema nokdaksüla. Item tatalokba aitsüba den külemi onoki Khristantem aser democracy pusemertem dang yimjung nung alitsü ayongzüküer," ta Poola-i metetdaksü.

Paisa sorkar aser telok balala dang yimjung nung ken o jembiba ajanga mangatettep ken o ajak bentettsü ayongzük.

Bareilly nung tongti putir, Ignatius D'Souza-i,

"Meimchirtem tepsetbaji tangatetba kecha agia medentsütsü makok. Item lendong nung asür kibongtem atema onoki sarasademtsür," ta lemsatetep.

Ano külen May 6 nü Kerala Catholic Bishops Council (KCBC)-ia Centre sorkar dang Manipur nung tensa azüoka yimjung alitsü atema inyaksü mepishi.

"Manipur nung yimjung alitsü atema Centre sorkari mera agia inyaksüla. Tesüiba anogo ishika Manipur nung rara adoka tensa majungba atema onoki tebilemtsü akar," ta KCBC Tir, Baselios Cleemis-i metetdaksü.

All-India Catholic Union (AICU)-ia, "Manipur nung nisung aika asüba atema jashia bilemtsür. Sorkari Supreme Court nung tang teinyakdak judge mesüra mapa nungi anisüngzüküer aliba judge ka leniba nung judicial commission ka tentettsüla aser iba rara adokba kulitem bushidaksütsüla," ta takhangba agütsü.

USCIRF-i Iran densema linük 28 CPC list nung züngoktsü mepishir

May 08, 2023: Tawa U.S. Commission on International Religious Freedom (USCIRF)-i report ka ajanga yaküm Iran sorkari tetsür temeden atema longkak aiterem anema inyakba aser Iran nung Khristantem densema minorities anema inyakba atema iba linük ya CPC list (countries of particular concern) nung züngoktsü mepishio.

USCIRF-isa linük 27 CPC list nung züngoktsü mepishio.

Iran nung Mahsa Amini asüba anema linük nung tetsürtemi longkak aitba mapang nung sorkari parnok anema inyaka liasü. Arrshi küm 22 Amini-i la kou ngudaksüba ajanga lai tekolak meyiba sü ozüing alema inyakogo, ta aija yaküm police la apuba sülen sama.

"2022 küm September ita nung longkak ait metenzükba mapang nunga Iran nung religious freedom jenjang kanga

mejungi liasü. Sorkari yimjung meimer Iran nunger anema tashiyim amshiba ajanga religious freedom jenjang ano tamajungba kümogo," ta taoba Hombarnü 2023 USCIRF report sayadang USCIRF Chair, Nury Turkel-i metetdaksü.

USCIRF-isa State Department dang Myanmar, China, Cuba, Eritrea, Iran, Nicaragua, North Korea, Pakistan, Russia, Saudi Arabia, Tajikistan aser Turkmenistan linüktem-a CPC list nung züngoktsü mepishio.

USCIRF indang report tasenba nungjisa linük pongu-Afghanistan, India, Nigeria, Syria aser Vietnam linüktem-a CPC list nung züngoktsü mepishi.

Nury Turkel-i, State Department-i Nigeria aser India na CPC nung mezüngokba atema mepelaba metetdaksü. Pai, Nigeria ya reshikangshiba tiyongtsü tesem ka lir aser India

sorkari yimsü nung ajemdaker nationalist mapatongtem benoker; item rongnung senso agütsüba inyakyim nung tenokdangbatem, yimsü meyipba nokdangba, yimsü balala amanger tsüingda kiyimba nokdangba aser nashi tepsetba nokdangba densema lir, ta metetdaksü.

USCIRF Vice Chair, Abraham Cooper-i, Biden administration aser Congress-i alima nung religious freedom ajungkettsütsü atema inyakba atema USCIRF commissioner temi pelar, ajisüaka religious freedom anema inyakba asoshi US sorkari item linük anema taliba inyaksüla, ta ashi.

USCIRF-isa, Algeria aser Central African Republic na special watch list nung züngoktsüla aser Sri Lanka den Azerbaijan, Egypt, Indonesia, Iraq, Kazakhstan, Malaysia, Turkey aser Uzbekistan linüktema iba list nung züngoktsüla, ta mepishi.

ANOGO ABEN TSÜNGREM DEN

Tenüng Sangang (T.ken 103:1-5)

Kibuba dang kecha masüngdangi asenoki kobika jembitsü ni memetet. "O kü nela, Kibuba moajang; aser kü dak aliba ajak agi pa temeshi tenüng moajang. O kü nela, Kibuba moajang, aser Pa teyaritem tamadok" (t.1,2). T.Ken 103 nung tasüngdangba kecha mali. Iba nung tenüng asangba dang lir; Dawidi Kibuba moatsü.

Dawidi kechi temoatsütem asoshi iba ken aten? Itemji asenoki amadokbatem asütsü akok mesüra teti asoshi agüjadokba ta bilema alitsü akok. Mezüngbuba, Kibubai kümzüküer. "Shibai ne tai ajak atoker; shibai ne tashidak ajak anebtsür" (t.3). Pai ne aibelen ajak adoker kasa lenmang nung Pai meimchir temang anebtsür. Aiben Laishibai temenenji shirangba den medemdanga zülu, aser tekümtetji anema aliba den medemdang. Tsüngremi asenok tanela kümzüka anema yutsür.

Tanabuba, Pai wazüka ayur. "Shibai ne taküm kangla nungi alanzüküer; shibai temeim aser taochi agi ne nem korang semtsür" (t.4). Pai teraksatsüba ajak nungi asenok wazüka kümzüka ayur. Pai asen kolak nung chuba korang semtsür aser chuba kümdaksür.

Tasembuba, Pai tiptemdaksür. "Shibai tajung agi na jangraba tiptemdaksür" (t.5). Dawidi ashir, Tsüngrem asenok mongzü ama lanuwa tasen kümshidakja asenok tiptemdaksür. Mongzü tezüngtem melener, tezüng tejentem indoker, tasen agi melener aser tanaben yima aor.

Tsüngrem tenüng dang asangtsü nai sarasademer asü ? Nai Pa tenüng asangtsü aika lir, kechiaser tanen maka na meimer. Kümzüküer, tiptemdaksür, wazüka ayur. Ken tenüngsang agütsüba teperi masü; teti Pa tenüng asangba nung mapang agiang.

America nunger nisung ter shia nungi nisung trokibo sarasademer

May 08, 2023: US nung teimbai sarasademer, ta iba tekülem nung adentsü atema Tenla kidang aoertem kanga ajema kümogo, ajisüaka America nunger nisung 10 shia nungi nisung 6-ibo sarasademer, ta survey tasen ka ajanga bushitetogo.

Survey nung shilem agir shilem 85-i temaba tashi ka (Tsüngrem) den sendakteptsü atema tanela tsütsü langkabosa benschir, ta langzü.

Iba survey nungji America nunger 1,700-i shilem agia liasü aser survey report ji America nunger National Day of Prayer anogomong nung (May 4) Radiant Foundation-i saya.

America nunger tain shilem 50-i anepdang mesüra anüngdang sarasademer aser shilem 55-i aonung mejangtsü mapang nung sarasademer.

Sarasademertem rongnung Tenla kidang sarasademertem dang nungibo gari nung sarasademer teimba. Sarasademer shilem 61-i gari nung sarasademer aser sarasademer shilem 46-i Tenla kidang sarasademer, ta iba survey ajanga bushitet.

Radiant Foundation indang website Skylight executive director, John Dye-i, "Asenoki bilemba dang nungi nisung

report ajanga jangjar. Nisungtemi yimya balala nung sarasademer aser meimlaba tesemtem nung sarasademer," ta ashi.

Sarasademertem rongnung shilem 87-i, tesüiba ita 12 tsüingda parnoki sarasadema arudang Tsüngremi parnok sarasadem langzüogo, ta ashi.

Sarasadem nung bilemtetba tongtibangba onükji timtemlendon mapang nung pei kinünger/temeimertem atema sarasademtsüba (shilem 76) aser shirangertem atema sarasademtsüba (shilem 71) liasü.

Sarasademertem rongnung shilem 75-ibo yimsü dak sendakba oset/kaket kar amer sarasademer. Shilem 19-i candle tsükloker sarasademer, shilem 18-i tanga kaket kar amer sarasademer, shilem 18-i pillow mesüra oset kar nung temekok agi nendaker sarasademer aser shilem 18-i 'rosary' amer sarasademer.

Iba survey ya Skylight-i achayang aser Boston nung aliba research firm City Square Associates-i ketdangüsü agi. America nunger arrshi küm 18 nungi 64 tsüingdapur 1,783-i online ajanga iba survey nung shilem agia liasü.

AO OSHI ANGAZÜKDAK: TANÜ ANGAZÜKTSÜBA OJANG



Pungtet

(v) lenti ngutet, tesem ka atong (reach a place)

* Onok ajak lenmang lenti pungteta tugur yim ka pungtet.

Pungo

(n) züngdangba pezü ser ka tali (five)

* Ozü kidang onok pungo alir.

OLONG PAITEP # 6509

Grid for OLONG PAITEP # 6509 with numbers 1-18 in various positions.

TIPIEN

- 1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Repranzük - (4)
10. Tasola - (5)
11. S _ _ _ _ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. _ _ _ hi - (3)
16. Akümüli nungi pilar - (3)

OLONG PAITEP # 6507 TELANGZÜBA

TIPIEN :

- 2. Bangsemo, 6. Tiptem, 8. Jen, 9. Talila, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.

LANGTSÜNGLEN :

- 1. Tenükjang, 2. Luden, 3. Kioktsü, 5. Lenti, 7. Tajangzük, 11. teronem, 12. Sempa, 13. Jahaz.

KHEN SHISADANGDI

ALOKBAI MOTHER'S DAY ATEMA AROGO DANG TEBILEMBA KA LEMSATEPER

ALOKBA : Good morning Pastorba. Ken arudangerko yah! Tebilemba ka lemsatepedi.
PASTOR ALOKBA : Koda! Alokba! Kechi lemsatepner, Shiangma.
Pastorba : Wah Pastorba, May 14 nü Mother's Day amongtsü lirji Ojala tem nem langkabo renemja lir südi tu?...

-Ainla Ao

Union minister Rijiju-i Tagin oshi indang film trailer sayatsü



Itanagar, May 8, 2023 (Agencies): Union minister Kiren Rijiju-i tawa tu Arunachal Pradesh nung Tagin oshi indang mezüngbuba movie trailer sayatsüogo.

"Love in 90s" ta ajaba mezüngbuba Tagin film ya Arunachal Pradesh nung Tagin

nunger sobaliba sayatsü atema yangluba lir.

"Iba film ya tax free asütsü aser Arunachal Pradesh sorkar dang iba film ajungkettsü atema mepishir" ta Rijiju-i ashi.

"Iba mapang taküm libaliro jangratemtsüka liasü. Lanu putui iba film kanga sapua reprangtsü

saka 90s mapang meimtepertemi kanga metettsü" ta paisa union minister Rijiju-isa ashi.

Itanagar nung lapoktsüba aliba National Institute of Film and Television (NIFT) ajanga iba Northeast indang art and culture ajungkettsü ta paisa metetdaksü.

Meghalaya nung BSF-i truck driver ka khaset

Shillong, May 8, 2023 (Agencies): Meghalaya kübok East Khasi Hills nung arishi küm 32 tain truck driver ka BSF sepaitemi khasetba sülen bushisüngdang ka tenzükogo. Iba truck gari nung nashi bona liasü.

Mawshun nung aliba check post nung BSF sepaitemi truck ka nung injang khaloktsüdang driver Roning Nongkynrih khaset. Iba lendong ya Honibarnü India-Bangladesh arrtsü anasa atalok.

Border Security Force (BSF)-i iba tatalokba atema court of inquiry ka tenzükogo.

Truck gari jagi parnok dak menüngtsü ta tsübuu bilemba agi self-defence nung injang khaloktsü ta BSF sepaitemi ashir.

Truck gari nung tasüsanger kinunger Ribalskhem Nongkynrih mena liasü aser pai ashiba agi BSF sepaitemi point-blank range nung injang khaloktsü.

Pynursla Police Station nungi police telok ka den magistrate ka tesem tonga yokogo ta East Khasi Hills district Superintendent of Police S Nongtnger-i ashi.

"Iba atema sasaa bilemer

asur Indian Penal Code nung Section 302 (murder) kübok keno ka benokogo" ta Nongtnger-i ashi.

Meghalaya Frontier BSF Inspector General Pradip Kumar-ia nisung asüba atema mangyimba metetdaksüogo aser bushisüngdang tenzükogo ta ashi.

"DIG rank officer ka lenisüba kübok court of inquiry ka asütsü tuyuogo. Onoki kulitem bushitsü. Iba tatalokba nung shilem agir sepai 3 mapa nungi anienogo aser tang frontier headquarters, Shillong nung lir" ta pai ashi.

Meghalaya nunger kaketshir ajak anir aruogo: Conrad Sangma

Shillong, May 08, 2023 (Agencies): Manipur nungi Meghalaya kaketshir ajak state tonga aruogo ta tanü Chief Minister Conrad K Sangma-i ashi.

May 8 nü kaketshir telok tatembangba anir arutsü atema Imphal nungi Shillong tashi

tayimtsü ka renem ta Meghalaya CM-i ashi.

"Tesüiba anogo asemnü tsüngda kaketshir 300 mesüra tema Manipur nungi anir aruogo.

State sorkari parnok travelling expenses ajak agütsüogo" ta Conrad-i ashi.

Charter flights maliba ajanga timtem aika ajuru saka state sorkari item ajakji koktet ta paisa ashi.

"May 8 nü kaketshir ajak anir aruogo saka kaketshir ka mesüra ana dang maru" ta Conrad-isa shisem.

Tripura sorkar paperless akümtsü: CM Manik Saha



Chief Minister Prof. Dr. Manik Saha-i 'Smart Training Center' aser 'Training on Digital Tripura Initiative' lapoktsüba angur.

Agartala, May 8, 2023 (Agencies): Tripura sorkar indang official works ajak paper mamshii dang inyakttsü lemetogo ta Chief Minister Prof. Dr. Manik Saha-i ashi.

Agartala nung aliba IT Bhavan nung 'Smart Training Center' aser 'Training on Digital Tripura Initiative' lapoktsüdang pai iba osang metetdaksü.

"Asen sorkar smart akümtsü. Asenok smart city ka lir aser tang

smart training center ka lapoker" ta Chief Minister-i ashi.

Prime Minister Narendra Modi-i tuyuba ama Tripura sorkar paperless akümtsü lemetogo, ta paisa shisem.

Iba ya ochishia ketdangtsütsü atema lir. Files timi bushitettsü aser koba jenjang nung lir metettsü atema iba maparen tenzük, ta CM Saha-isa ashi.

Sorkar taküm küm tatemlen tashi nung e-Office aser

digitization maparen tenzüktsü tebilemba lir. Iba nung sorkar department ajak adentsü aser districts o sub-divisions ajak nung iba mapa inyakttsü ta paisa metetdaksü.

Iba sentong nung Minister of Finance, Planning & Coordination, and IT Pranajit Singha Roy, Chief Secretary JK Sinha, Principal Secretary IT Puneet Agarwal aser Director of IT Department Dr. Naresh Babu nungertem aden.

DR Congo tzümetzung nung asür nisung 400 alemogo



DR Congo nung South Kivu province kübok Nyamukubi yimtsung nung tzümetzung agi ki raksatsür aliba anasa nisungtem senzüba noksa nung angur.

Kinshasa, Monupii/May 08 (Agencies): Tan hopta Democratic Republic of Congo nung tzümetzung adoka aser anentsüh aluba nung asür nisung 401 jungogo, ta linük anüdoklen South Kivu province indang governor Theo Ngwabidje Kasi-i ashi.

Hokulbarnü nisung 176 asüba osang lir aser ano tali ang samar bushir, kong teyariteper temi tasü mang aika nguteta liasü. Brehostibarnü tzünglu kanga sashia aruba sülen ayong nungi tzü muteta adoka tzümetzung adokba nung ano nisung 205 kanga sashia yiru aser nisung 167 samar lir.

Kasi-i Reuters dang message ajanga nisung asürtem 401 jungogo, ta Hombarnü ashi. Pai iba dak alaka osang tali

magütsü. Hombarnü Tir Felix Tshisekedi-i anogo ka linük nung mangyimtsü sangdong aser minister tem telok ka lendong ataloka alidaki oa disaster management aser teyari agütsürtem den yaritepsü lir, ta sorkar odongtar Patrick Muyaya-i ashi.

South Kivu region nung tang mapang tzünglu kanga arur aser tzünglu ya May ita tatem tashi arutsü imlar.

Rwanda nung tzümetzung agi nisung 131 takum samatsür anogo ana lir kidanger linük Eastern DR Congo nung iba lendong ya ataloker, koba Lake Kivu tesem külem lir.

Linük anaprong nung tzümetzung adoka nisung asüba atema Honibarnü UN

Secretary-General Antonio Guterres-i astükhü lemsatepa liasü.

"Ibai ano tzü-mopung melenba aser alima tatsükba akumba atema kecha meinyakba linük nung kanga sashia kongshiba lir," ta pai Burundi semdangba mapang ashi.

Tzü-mopung melenba ajanga tzüngsang mopung tekeraba aser tesashiba ajurur, ta mongintemi ashir.

Taoba ita South Kivu anasa North Kivu nung tzünglu kanga sashia aruba sülen anentsüh alua nisung 20 asü.

DR Congo ya Europe anüolen teka linük tulu lir, aser alima nung tesensaktiba linüktem rongnung ka lir, kong anüdoklen rara agi sünga lir.

Peru nung hon atudak tesem ka nung mi adok; nisung 27 asü

Lima, Monupii/May 8 (Agencies): Peru antiolentiplen kinük nung aliba hon atudak tesem ka nung mi adokba sülen idakji inyaker nisung 27 tashi süogo.

Tawa mine tem nung lendong atalokbatem rongnung iba ya tamajungtiba ka liasü, ta ketdangsurtemi metetdaksü.

Ketdangsurtemi local media dang Deobarnü ashiba agi, hon aturtem ya ali telungleni feet 330 shi ir mapa inyaka aliba mapang Honibarnü short circuit ka ajanga mi adokdaksü aser tunnel rongnung ka milak agi asung.

Social media nung lemsatepba noksa balala ajanga Arequipa tesem nung tenemlen La Esperanza 1 mine nungi milak aser mokozü adokba sayuogo.

Lendong atalokba sülen hon atudak inyaker kinungertem Yanaquihua jila nung adenshia parnok kinungertem kechi tia nung ali iba indang osang atatepa liasü.

Asürtem rongnung Marcelina Aguirre Quispe kinungboa densema liasü aser lai mangyimba la kinungbo bushiba nguogo.

"Onoki mine telung nung short circuit ka asü aser iba sülen langka apokba jangjar liasü. Iba tatalokba yagi onok

kanga aoksateper lir," ta arishi küm 51 tain asür Frederico indang adianu Francisco Idme Mamani-i ashi.

Public prosecutor Giovanni Matos-i Channel N television dang ashiba agi, mine telung nung mapa inyaker nisung 27 asü.

Police temi iba lendong nung asürtem indang osang tejangja bendenba sülenang mine nung mi adokba indang osang ya Deobarnüang metetdakja liasü.

Mine telung nungi tasü mangtem magitet tsüngda teküzmükertemi lendong talila majurutsü atema jenjang tapet agia liasü.

"Asürtem aliba tesem nung lendong talila majurutsü atema jenjang agitsü nüngdaka liasü, ajita asünungdang onok ali telungi ia tasü mangtem bener adoktetsü," ta Matos-i ashi.

"Mi adokba mapang mine telung nung nisung kwi liasü mesüra teküzmükter karobo ali mali iba indang osang kecha magütsü liasü. Deobar nü menor tasü mang 12 agitet ajisüaka mangatokba ajanga inyaksangshi anena ata," ta police-i sangdong ka ajanga metetdaksü.

Yanaquihua Mayor James Casquino-i Andina news agency dang ashiba agi, miner tem ya timba mi agi arongba aser asphyxiation agi sür asütsü.

Kasa mapang nung regional sorkari sangdong ka ajanga ashiba agi, jongdak nung teküzmükba maparen inyaksü asoshi inyakyim tebenja liasü, kechiyong iba mine nungi anasatiba police station ji minute 90 shi pilar lir aser iba tesem nungi yimti anasatibaji ghonda ishika pilar-ang amenoka lir.

Iba mine ya Minera Yanaquihua meyong lir aser iba ya legal enterprise ka lir, ajisüaka iba tesem nung ozüng alema hon aturtem aika lir.

Iba company yagi Peru nung küm 23 tashi mine balala achaayanger.

Taoba küm mine dak sendakba lendong ka nung nisung 39 asü, ta mining and energy ministry-i metetdaksü.

2020 küma Arequipa nung mine ka chirepba sülen mine nung mapa inyaker pezü tashi sabanga yur süatok.

Peru economy nung mining ya kanga tongtibang lir. Iba linük ya Latin America nung hon aser copper adokdaksüba link tulutiba lir aser iba industry ya Peru indang gross domestic product shilem 8 dak tema lir.

Maneni Peru ya alima nung silver, copper aser zinc adokdaksüba linüktem rongnung tanabuba jenjang nung lir, ta official sangdong ka ajanga metetdaksü.

Office of the
LIONS' CLUB (SANGPU)
LONGSA VILLAGE
MOKOKCHUNG : NAGALAND

TENÜNGSANG AGÜTSÜR

Dr. Temsü Lemtur aser Wt. Narola Panger tena jala **Dr. Ayala T. Lemtur**-i I.T.S Dental College, Hospital and Research Institute, Greater Noida under Ch. Charan Singh University Meerut U.P nungi Bachelor of Dental Surgery (BDS) renemteta asen Club nem konang nüngsang bener arutsüba asoshi tetushi agütsür.

Tsüngremi ne wadang nung maneni moajangma ta asen Club sanger sarasadem.

Sd/- Nungsangtemshi
President

Sd/- Temsutoshi
Secretary



ALI PATTA SAMAER BUSHIR

Dimapur nung Aoyimkü m yimtak Senden Mepu nung kü ali patta no.0050 samaogo. Anungji kari danga ngura phone number 9436 00 4541 nung metetpeladaksüner.

Trump-i New York nung kuli agütsütsü memolung

New York, Monupii/May 08 (Agencies): Taoba US tir Donald Trump-i kuli agütsütsü maongka tatembangba magizük, kong advice columnist kati 1996 küm luxury department store dressing room ka nung Trump-i tashiyim amshia shi nung medem ta tai tonglokja lir.

2024 küm tir election nung Republican candidate, Trump nem Deobar nikonngang 5:00 ako tashinung kuli agütsütsü asoshi US District Judge Lewis A Kaplan-i mapang agüja liasü. Sala ken o kecha magütsü.

Ibai taoksatsü map aka masü. New York City nung hopta ana ken o jembidang kaket zülur E Jean Carroll-i anogo ishika kuli agütsüdang lai 2019 memoir nung temai adoktsüba nenshia shia liasü saka iba mapanga Trump maru. Lai iba ken o nung sen dollar million aika meshir.

Obendanger temi October ita videotape ka nungi agitetba repranga liasü, kong Trump-i Carroll dak tashiyim agi shi nung memedem mesüra la ya junga memetet ta tekong meranga jembia liasü.

Trump kuli medeni okatsür temi Hombarnü parnok tangatetba lemsatepsü aser Mongulbarnü nungi ken o jembia tenzüksü.

Ken o bener arur temi Brehostibarnü ken o benoktsüba sülen Trump indang okatsür Joe Tacopina-ia kuli alirtem kata mejaoki par tsütsü ken o benoka liasü. Trump-i kuli agütsütsü atema pai mapang tali memishi.

Brehostibarnü Kaplan-i Trump temolung melenshütsü asoshi mapang tali agütsü aser kuli agütsütsü mepishia liasü.

Witness stand nungi arishi küm 79 tain Carroll-i kuli agütsüba mapang, arishi küm 76 tain Trump-i 1996 küm tetenzüklen midtown Manhattan department store Bergdorf Goodman nung ajurutepba sülen la dak tashiyim agi shi nung medem, ta kuli agüja liasü.

Lai ashiba agi, tetsür ka nem sempet ka alitsütsü asoshi Trump-i la dang teyari meshi aser asayamenüa aser mesüshitepa tenzüker aser tatem nung pai iba store nung tashiyim agi shi nung medem, ta kuli agütsü.

Carroll-i ken o ya yangluba lir aser la indang kaket jung ayoktsü mechi tiazü jembia ken o yanglur, ta Trump-i shia arur.

Küm aika jakdang tim masüba mapa ajangshia alirtemi kuli agütsütsü mela New York state ajanga November ita ozüng ka yanglur minute ishika lir Carroll-i Trump anema ken o ya benoka liasü.



Arequipa, Peru nung SERMIGOLD mine telung nungi madokteti aliba hon bushir miner kinungertem iba tesem anasa adenshia aliba noksa nung angur. Arequipa nung aliba Yanaquihua district kübok iba hon atoba longpok telung nung Honibarnep mi adoka iba longpok telung nung hon ator nisung 27 süogo, ta ketdangsur temi ashir.



Royal Challengers Bangalore nungi asaya Virat Kohli, Faf Du Plessis aser Glenn Mazwell nung Mumbai Indians den asayatsü lia osangbenrtem den sensaksemba mapang tangokba noksa nung angur.

WTC Final atema KL Rahul melen Ishan Kishan shimogo

Monupii/May 8, 2023

(Agencies): Board of Control for Cricket in India-i Hombarnü sangdong ka ajanga World Test Championship Final nung KL Rahul masayadaksütsü atema telemtetba agiba sangdongba den pa takaratiba nung surgery agitsü asoshi telemtetba agiogo aser iba sülen National Cricket Academy nung maneni temang anepalutsü, ta shisem.

BCCI-isa Rahul melena Ishan Kishan shimba aser Rituraj Gaikwad, Suryakumar Yadav aser Mukesh Kumar nung reserve ama shimba metetdaksüogo.

Taoba hopta IPL 2023 nung Lucknow Super Giants aser Royal Challengers Bangalore na asayaba mapang fielding amendang yiruba sülen Rahul-i pa June 7 nü nungi tenzüka Oval, London nung Australia

den asayatsü aliba ATC final nung masayatetsü ta shir liasü.

"Ni taruba ita team India den Oval-i motettsüsa akümba atema kanga mepelar. Ni takok tashi team nungi maneni asaya-a linük nem teyari agütsütsü merangtsü," ta arishi küm 31 tain asayar yagi social media ajanga lemsatap.

Paisa, "medical team den ken o angatettepba sülen ni takaratiba nung surgery agitsü asoshi telemtetba agiogo. Ni taruba hopta ishika tsüingda rehabilitation aser recovery dak rangloker inyaksangshitsü. Iba amala telemtetba agitsü ya temela masü saka ni temang kanga junga taneptsü angutsü atema iba ya tongtibang lir," ta ashi.

BCCI-isa, Jaydev Unadkat Jaydev Unadkat indanga metetdaksüogo, shiba RCB pur

Lucknow den masaya tsüingda net nung ball onshiba mapang tapu yirua liasü. "Mongintem den ken o ashishitepba sülen left-arm fast bowler ya tang National Cricket Academy, Bengaluru nung pa tapu yirur aliba anepaludar. Pa WTC final nung asayatsü atema mapang tatsüka lir telemtetba agitsü," ta board sangdong ajanga metetdaksü.

WTC atema shimba India nung asayartem rongnung Umesh Yadav-a IPL asayaba mapang yiruogo. Pa taoba ita RCB den KKR tenüing nungi asayaba mapang hamstring' yirua liasü, ta BCCI-i asatetogo aser ashiba agi taruba hopta ishika tsüingda pa temang koma akümer aji asadanger taruba ita final nung asayadaksütsü masayadaksütsü iba indang telemtetba ka agitsü.

73 Group B nung Ajith Narayana temaba jenjang nung tembang

Monupii/May 8, 2023

(Agencies): India nung weightlifter Ajith Narayana aser Achinta Sheuli na Hombarnü Asian Championships nung tebur 73kg event Group B nung mezüingbuba aser tanabuba jenjang nung tembangogo.

Mezüingbuba senior asayamung ka nung shilem agiba mapang Ajith-i 307kg (139kg+168kg) ajungket aser Achinta-i 305kg (140kg+165kg) ajungketa liasü.

Tenaprongla entry weights dak ajemdaker Group B nung lezmüksü. Entry weight benokertem group A nung yamaji tanungbatem group balalai yoker.

Ajith-i snatch nung mezüingbuba aser tanabuba nung 135kg aser 139kg ajungket saka tasembuba nung 141kg ajungkettü merangba makok.

Kasaji pai clean and jerk nunga 164kg aser 168kg ayong ayonga ajungket saka

tasembuba nung 171kg majungkettet.

Kasa mapang nung Achinta hamstring yiruba ajanga masayai lir tang asaya tenzükogo pai barbell aseben dang ajungketteta liasü.

2021 Junior World Championship silver medallist asayar yagi snatch nung 140kg dang ajungketteta liasü. Pai tang tashi nung barbell seret timtiba ajungketbaji 143kg lir.

Clean and jerk section nung pai 169kg aser 171kg ajungkettü merangbang saka makok.

Pai taoba küm CWG nung gold medal anguba mapangbo 170kg ajungketa liasü.

Iba asayamung nung India nung asayartem silver medal asem nguogo. Medal ya Bindyarani Devi-i ana aser Jeremy Lalrinninga-i ka ngua liasü.

Continental aser World Championships nungbo medal ya snatch, clean and jerk, aser

total lift nung medal balala agütsür. Ajisüaka Olympics nungbo ajak senteper ka dang agütsür.

2023 Asian Championships ya 2024 Paris Olympics atema tanabuba qualifying asaya liasü.

Ajisüaka iba ya asayamung ya talila ka liasü aser compulsory masü asü, ibayongji asayartem kanga kümdanga asayaogo.

2024 Olympic qualification temzüing ozüing kübok asayar ka 2023 World Championships aser 2024 World Cup nungbo kechi südir süaka asayatsüla, ta shia lir.

International Weightlifting Federation (IWF)-i weight category ajak atema qualification mapang tembangba sülen Olympic Qualification Ranking (OQR) sangdongtsü. Asayartem tatembangbuba asadangtsü atema parnoki qualifying event tem nung tajungtiba asayatetba asem asadangtsü.

BAI selection trials: Srikanth & Chaliha natemabajenjang nung tembang

Monupii/May 8, 2023

(Agencies): Asian Games atema BIA-i ayongzükba seletion trail nung tebur aser tetsür kija asaya nung Kidambi Srikanth aser Ashmita Chaliha na temaba jenjang nung tembanga team nung züingoksemogo.

Jwala Gutta Badminton Academy nung anogo pezü trail agiba mapang Srikanth aser Chaliha naprongla asaya ka nung danga tamakok mongui asaya-a kija asaya nung shilem agitsü atema PV Sindhu aser HS Prannoy na den densemogo.

Srikanth-i group A nung Mithun Manjunath 22-24 21-13 21-14 agi akok aser iba sülen Siddhanth Gupta 21-13 21-16 agi akok aser Lakshya Sen 21-15 21-14 agi koka liasü.

Stage 2 nung Srikanth temaba jenjang nung aser pa sülen tanabuba jenjang nung Lakshya liasü.

Team championship nung Lakshya aser Manjunath na densemaga tebur kija asaya team abensaogo.

Tetsür kija asaya nung

Chaliha temaba jenjang nung aser la sülen Anupama atema BIA-i ayongzükba Upadhyaya aser Unnati Hooda na lir.

Iba trail nung jenjang asemsem atema tebur asayar teku aser tetsür asayar ti-i shilem agi aser kasa mapang nung tebur tarep asaya aser tarep temeyoktep asaya atema tarep pezüzü asaya aser tetsür kija asaya atema tarep asem asaya liasü.

India squad:

Tebur kija asaya: HS Prannoy, Kidambi Srikanth (Individual/Team), Lakshya Sen, Mithun Manjunath (Team)

Tebur taep asaya: Satwiksairaj Rankireddy/Chirag Shetty, Dhruv Kapila/MR Arjun (Individual/Team)

Tetsür kija asaya: PV Sindhu, Ashmita Chaliha (Individual/Team), Anupama Upadhyaya, Malvika Bansod (Team)

Tetsür tarep asaya: Gayatri Gopichand /Treesa Jolly, Ashwini Ponnappa /Tanisha Crasto (Individual/Team)

Tarep temeyoktep asaya: Rohan Kapoor /N Sikki Reddy, Sai Pratheek K/Tanisha Crasto.

Vincent Kompany-i Burnley den tenanzüktepba yanglushi



Monupii/May 8, 2023

(Agencies): Second-tier Championship koka Premier League nung asayatsü asoshi maongka ngutetba sülen Burnley manager Vincent Kompany-i club den tenanzüktepba yanglushiogo aser pai 2028 küm tashi club manager mapa abentsü, ta club sangdong ka ajanga metetdaksü.

Burnley pur season ka sülen tanaben Premier League nung asayatsü atema jenjang ajanzüktepetogo. Parnoki asayamung nung asaya ana asayatsü anunga lia Championship koka liasü.

"Burnley aser Turf Moor na ya tetenzük nungi shitak ta bilem anungji taruba küm pongu atema tenanzüktepba yanglutsü ya kanga dang tim ta bilem," ta taoba Manchester City aser Belgium defender

Kompany-i ashi.

"Fan tem den külemi onoki Turf Moor ya tanaben tashi ita kümdaksüogo tarutsü atema aser jenjang ajak nung Burnley tajungba kümdaksütsü asoshi yongya atar," ta paisa ashi.

"Vincent-i tenanzüktepba tasen yanglushiba atema kanga pelar. Pa Burnley Football Club tejakdangi anir aotsü asoshi tetemsü lir," ta Burnley mendenbuba Alan Pace-i ashi.

"Pa lenir kanga tajung ka lir aser nükjidong tulu yur pai onok indang club nung onoki ajanzükknüba jenjangtem tonga anir," ta paisa ashi.

Burnley puri takok tajung anguba sülen taoba NFL asayar J.J. Watt aser pa kinungtsü Kealia Watt natia club nung invest süogo. Watt ya taoba mapang U.S. international soccer asayar ka liasü.

BILEMDANGANG

"Iba lima toktsür tatem maka alitsü asoshia renemang."